

16. november 2009

UKA09/95

**Aalisarneq pillugu Inatsisartut inatsisaata nr. 18-ip, 31. oktober 1996-imeersup  
allanngortinneqarnera pillugu Inatsisartut inatsisaattut siunnersuut  
(Naalakkersuisunut ilaasortaq Ane Hansen, Inuit Ataqatigiit)**

**pillugu**

**Inatsisartut Aalisarnermut, Piniarnermut Nunalerinermullu  
Ataatsimiititaliaata**

**ISUMALIUTISSIISUTAA**

**Siunnersuutip aappassaaneerneqarnerani saqqummiunneqartoq**

Inatsisartut Aalisarnermut, Piniarnermut Nunalerinermullu Ataatsimiititaliaat  
suliarinninnermini ukuningga inuttaqarpoq:

Inatsisartunut ilaasortaq Hans Aronsen, siulittaasoq, Inuit Ataqatigiit  
Inatsisartunut ilaasortaq Andreas Uldum, siulittaasup tullia, Demokraterne  
Inatsisartunut ilaasortaq, Anders Olsen, Inuit Ataqatigiit  
Inatsisartunut ilaasortaq, Hans Enoksen, Siumut  
Inatsisartunut ilaasortaq, Siverth K. Heilmann Atassut

**1. Siunnersuutip siullermeerneqarnera**

Inatsisartuni naalakkersuisooqatigiinnit siunnersuut tapersorsorneqartoq,  
illuatungiliuttunilli siunnersuut itigartitsissutigineqassasoq Ataatsimiititaliap  
maluginiarpaa.

**2. Siunnersuutip imarisaa.**

Kalaallit aalisarnerisa annertunerpaamik piujuaannartitsinissaq tunngavigalugu ingerlanneqarnerata siuarsarneqarnissaa siunnersuummi ataatsimut isigalugu anguniarneqarpoq. Tamanna ilaatigut pissaaq aalisarnermik susassaartut oqartussaasunut ullumikkornit paasissutissanik amerlanerusunik tunniussisarnissaannik pisussaaffilernissaannut Naalakkersuisut piginnaatinnerisigut. Tamatumunnga pissutaatinnerqarpoq aalisarneq naalakkersuinikkut aaqqissuussaannerusumik ilisimasanik tunngaveqarnissaa anguniarneqarmat. Inatsisip siunertatut §-iani 2-mi allannguutit kalaallit aalisarnerisa aqunneqarnerani atuuttussamik pingaarnernik maleruagassiornissaa anguniarneqarpoq, taamaalilluni aalisarnerup aalisagaqatigiiaanun sunniutai piujuaannartitsineq tunngavigalugu inissisimasinnaassammatt. Allannguummitaaq aallaaviuvoq aalisarneq akisussaassuseqartumik maleruagassaqartinneqarluni ingerlanneqartoq nunanit tamalaanit annertunerusumik isiginiarneqalermat, taamaalilluni atuisut annertunerulersumik tamanna pillugu isumaat naapertorneqassammatt. Tamatuma saniatigut MSC-mik (Marine Stewardship Council) aaqqissuussineq naapertorlugu kalaallit aalisakkanik nioqutissiaasa akuerineqarnissaat aqutissiuunniarlugu suliniarnermik inatsisissatut siunnersuut siunertaqarpoq.

Taamatut atuisut akiliuteqartarnerat pillugu aalajangersakkamik ilanngussisoqassaaq. Atuisut akiliuteqartarnerisigut anguniarneqarpoq oqartussaasut aqutsinerannut, allaffissornerannut aamma aalisarnerup nakkutigineqarneranut atatillugu inuussutissarsiortut allaffissorinikkut aningaasartuutiniq ilapittuuteqaqataanissaat [1]. Siunnersuutikkuttaaq tunitsiviit qarasaasiakkut nalunaaruteqartarnissamik pisussaanerisa aallartinnissaannut pisussaaffiliinissamut Naalakkersuisut piginnaatinnerqarnissaminnik ujartuippat. Inatsisissatut siunnersuutikkuttaaq qarasaasiakkut logbogit atuutilernissaannut Naalakkersuisut periarfissinneqarput, tamanna aalisarnermit paasissutissat katersorneqartartut pitsaanerulernissaannik siunertaqarpoq. Inatsisissami siunnersuummi § 29-mi allannguutissatut siunnersuutit aalisarnermi nunniussisarnermi nakkutilliinermik aallartitsinnissamut Naalakkersuisut piginnaatinnerqarnissaannik periarfissiippat. Nunniussinermi nakkutilliinerup siunertaraa Kalaallit Nunaata imartaani unioqutitsilluni aalisarnerit pinngitsoortinnissaat aamma pisariaqarpat qulaajarsinnaanissaat. Allannguutittaaq siunertaraa nunat tamalaat pisussaaffisa Kalaallit Nunaata nunani tamalaani aalisarnermik suleqatigiiffinni ilaasortaanermigut akuerisimasai naapertortinnissaat, tamatumanimi Kalaallit Nunaat naalagaaffippassuit allat peqatigalugit aalisarneq killilersugaanngitsoq unioqutitsinerusorlu akiorniassallugu imminut pisussaaffilernikummat.

### **3. Siunnersuutip tusarniaassutigineqarnera**

Aalisarneq pillugu inatsisip allanngortinnissaanut siunnersuummut ilaatillugu siunnersuut tamarmiisoq 2007-imi maajip 17-ianiit 2007-imi juunip 29-anut tusarniaassutigineqarpoq. Taassuma saniatigut siunnersuut iluarsisaq 2009-mi juulip 20-aniit aggustup 17-ianut tusarniaassutigineqarluni, tassa inatsisissatut siunnersuutip imaanik ilisimasaqalernissamik pingaartumik sineriammut qanittumi aalisartut allamik aamma periarfissinneqarnissaannik Naalakkersuisut kaammattuuteqareernerisa kingorna.

Suleqatit makku tusarniaanissami aalajangersakkat taakku tiguaat; Aalisarneq pillugu Siunnersuisoqatigiit, Inuussutissarsiornermut Naalakkersuisoqarfik, Aningaasaqarnermi Aqutsisoqarfik, Nunanut allanut Pisortaqaarfik, Aatsitassanut Pisortaqaarfik, Ilaqutariinnut Naalakkersuisoqarfik, Peqqissutsimut Naalakkersuisoqarfik, Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik, Ineqarnermut Attaveqarnermullu Naalakkersuisoqarfik, Akileraartarnermut Aqutsisoqarfik, Avatangiisinut Pinngortitamullu Aqutsisoqarfik, Aalisarsinnaanermut Akuersissutinik Nakkutilliisoqarfik, Grønlands Kommando, Politimestereqarfik, Pinngortitaleriffik, Kalaallit Nunaanni Sulisitsisut Kattuffiat, KNAPK, AGF KNI-p ataaniittoq, SIK, NUSUKA, KANUKOKA, DG-Fish (EU-Kommissioni), GrønlandsBanken, Sparbank Vest, Greenland Venture, Nunatsinni Takornariaqarnermi Inuussutissarsiornermilu Siunnersuisoqatigiit, Royal Arctic Line, Nunatta Eqqartuussivia, Deloitte, A-Revision, Censor Revision, Grønlands Revisionselskab, Rebekka Olsvig Revision, Revision & Regnskab, Top Revision og Revisionsfirmaet, Polar Seafood, Royal Greenland A/S aamma Grønlands Kommando.

Inatsisissatut siunnersuummi uani pineqartut §§ 25, 29 aamma § 14 imm. 5 inatsisissatut siunnersuutigineqartut arlaannit oqaasertalernagit makku tusarniaassutigineqartumut akissuteqarsimapput:

Aalisarneq pillugu Siunnersuisoqatigiit, Aningaasaqarnermi Aqutsisoqarfik, Aatsitassanut ikummatissanullu Pisortaqaarfik, Sulisoqarnermi Aqutsisoqarfik, Ilaqutariinnermut Peqqissutsimullu Naalakkersuisoqarfik, Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik, Ineqarnermut Attaveqarnermullu Naalakkersuisoqarfik, Akileraartarnermut Aqutsisoqarfik, Suliffeqarnermut Inuussutissarsiutitigullu Ilinniartitaanermut Naalakkersuisoqarfik, Aalisarsinnaanermut Akuersissutinik Nakkutilliisoqarfik, Kalaallit Nunaanni Sulisitsisut Kattuffiat, Grønlands Kommando, Politimestereqarfik, Pinngortitaleriffik, KNAPK, SIK, NUSUKA, KANUKOKA, DG-Fish (EU-Kommissioni), GrønlandsBanken, Takornariaqarnermi Inuussutissarsiornermilu Siunnersuisoqatigiit, Nunatta Eqqartuussivia aamma Deloitte, Polar Seafood A/S kiisalu Royal Greenland A/S.

Tusarniaaffigisanit isummat assigiinneqimmata ataatsimiititaliap uissuummissutiginnilaa, kalaallimmi aalisarnerannut atatillugu soqutigisat susassaqtullu amerlaqimmata. Taamaattumik inatsisissatut siunnersuummut tusarniaaffigisat ataasiakkaat isumaat naatsumik issuassallugit ataatsimiititaliaq pissutissaqarpoq, taamaalilluni Inatsisartunut tusarniaaffigineqartut isumaat siamaseqisut assersuutigineqarsinnaammata.

## **GA**

Atuisunut akiliuteqartitsinerup tunngatillugu GA-p maluginiarpaq, Aalisarneq pillugu Ataatsimiititaliarpuup atuisunut akiliuteqartitsinerup tunngavissaata qulakkeeqqaarnissaanik kaammattuuteqarsimanera. GA-p tamanna itigartinnilaa tamannalu pillugu Namminersorlutik Oqartussat inuussutissarsiuteqartunik isumaqatiginninniarnissaa kaammattuutigalugu. GA-p isumaa malillugu inatsisissatut

siunnersuummi tunngavissaq annertuallaarpoq. GAp oqaatigaa, 2006-imili aningaasatigut ingerlatsinermi suliniutitut arlalinnut ataqatigiissaarinnissaq noqqaassutigineqartarsimasoq.

## **KNAPK**

*”Siullermik siunnersuutip 2007-mi tusarniaassutigineqarnerani aammalu kingullermik julip 20-niit 2009-mi tusarniutigineqarmat KNAPK-miit akissutaareersut innersuussutigalugit Inatsisartunut imaattumik erseqqissaateqassaanga:*

*KNAPK aalisakkanik qalerualinnilluunniit akuersissutinut atuisut ukiumut ataasiartumik 1.500,00 kr.-inik akiliuteqartalersinnaanerannut siunnersuummut tunngaviusumik tapersersuivoq. Inuiaqatigiinni isumalluutit uumassusillit piniartunit aalisartunillu atorpeqartuarsinnaanerat KNAPK-mit sakkortunerpaamik tapersersorneqartuarpoq tamannalu allannguuteqanngilaq. Nalunngilarpummi inuiaqatigiinni kikkut tamarmik killilersugaanngitsumik isumalluutininik uumassusilinnik atuisinnaanngimmata – atuisinnaasullu tassaasariaqarput inuussutissarsiummik ingerlataqartut.*

*KNAPK-miit akiliutigineqartartup ukiumut 1.500 kr.-nik inissinneqarnera isumalluutininik atuigallarsinnaanertut isigalugu akiliutitut isigaarput. Siunnersuutigineqartumilu § 14, imm. 5-tut nutaatut ikkunneqartussaag tamakkiisumik tapersersorparput.*

*Siunnersuutigineqartorlu ataatsimoortumik tunngaviusumik isummerfigissagaanni KNAPK-miit tapersersornartinneqarpoq tassuunaatigut tulaassuisut tulaassaag tamakkiisumik oqimaalutarneqartalerlutik akilerneqartalersinnaanerat aqutissiuunneqassammat. Ilanngullugulu erseqqissaatigineqassaaq tulaassat akilinngitsoorneqartartut nalingat manna tikillugu atuisutut akiliuteqartalernikkut aningaasartuutaaneruligassaannut annertunerusumik isertitaqalernikkut matussuserneqarsinnaanera periarfissatut isigigatsigu.” Ataatsimiititaliap ulloq 16. november ataatsimiinnermini KNAPK-p allakkiaanik ulloq 13. november 2009-meersumik ilisimasaqalersinneqarpoq. Taanna isumaliutissiissummut uunga tapiliussatut ilanngunneqarpoq.*

## **AP**

Kattuffik AP tusarniaanermut akissummini nalunaarutigaa, nr. 1-imi Naalakkersuisut piginnaatinneqarnerat ingasappallaartoq, toqqaannartumillu akileraarusersuinerunnginnersoq misissorneqartariaqartoq. AP naapertorlugu ersarissumik takuneqarsinnaasariaqarpoq akiliutitigut suut matussuserneqarniarnersut.

## **SIK**

*”SIK-p inatsisissamut allannguutissatut siunnersuutigineqartut assut iluarisimaarpai. Neriukkatta taamaasilluni imartatta pisuussutai uumassusillit*

*inuiaqatigiinnut naligiinnerusumik iluaqutiginnaannngortillugit inatsimmut allannguutissatut siunnersuutit periarfissiissasut, imartammi pisuussutai inuiaqatigiit tamarmik pigimmatigit, tamarmillu naligiinnerusumik iluaqutigisariaqarmatigit.*

*Kiisalu inatsimmut aamma allannguutissamut siunnersuutigineqartut kilisaatini / aalisariutini annertunerusumik nakkutilliisinnaanermut periarfissiineri assut iluarisimaarparput, taamaasilluta neriulluta ukiuni arlaqalersuni ilumut kilisaatit / aalisariutit eqqortumik nalunaarsuinersut assortuussutigineqartuartoq assortuussutigineqartussaajunnaarlugu inatsisissamut allannguutissap inississagai.”*

## **GrønlandsBanken**

Grønlandsbanken-imit oqaaseqaat naapertorlugu isumalluutininik allanik tassalu aalisarnermi isumalluutininik atuinermi akiliuteqartitsisarnermut atatillugu atuisunut akiliuteqartitsisarneq isiginiarneqassasoq. Ilanngullugu Grønlandsbanken isumaqarpoq, aalisarnermik inuussutissarsiuteqartunut aningaasartuutitigit nammakkiiniarnerit suulluunniit sioqqullugit aningaasartuutit nutaat aalisarnermik inuussutissarsiortunut kingunerisassai nalilersorneqaqqaartassasut.

Ataatsimiititaliaq isumaqarpoq Naalakkersuisoqarfik tusarniaanermi akissutinik suliarinninnermini tusarniaavigineqartut saqqummiussaannik eqqortumik saqqummiussisimasoq. Tusarniaaneq naammaginartuusimasoq Ataatsimiititaliaq isumaqarpoq.

## **4. Siunnersuutip Ataatsimiititaliamit suliarineqarnera**

Siunnersuutip misissornerani teknikikkut eqqortumik ilusilersorneqarsimasoq aamma nassuiaatini nalinginnaasuni tusarniaanermi akissutit naalakkersuisoqarfimullu tusarniaanermi akissutit sammisai siunnersuutip naalakkersuinikkut nalilerneqarnissaanut Inatsisartut naammaginartumik aalajangiinissamut tunngavissinneqarsimasut Ataatsimiititaliap maluginiarpaa. Tamatuma saniatigit siunnersuummi siunertaasut isumaqatigiiffiunngitsut aamma siunnersuutip siullermeerneqarnerani partiit tamatumunnga ersarissumik naalakkersuinikkut isummernerat Ataatsimiititaliamit maluginiarnepoq.

## **5. Ataatsimiititaliap inassutaa**

**Ataatsimiititaliami amerlanerussuteqartut Inuit Ataqaatigiinneersut aamma Demokratineersut siunnersuut akuerineqassasoq inassutigaat, siunnersuullu pillugu ima oqaaseqaateqarlutik:**

Amerlanerussuteqartut isumaqarput inatsisissatut siunnersuummi anguniakkat aalisarnerup aqunneqarneranut nakkutigineqarneranullu pisariaqarluinnartunut tunngasuusut, tassaallutik ilaatigit aalisarnerup pinngortitami nerisaqaqatigiinnermut

sunniuteqarnerata akuerineqarsinnaasumiitinnissaa, aalisarnermi aningaasat kaaviiartinneqartarnerisa malinnaavigineqarnissaat, aalisarnermit tulaassisarnermik nakkutilliineq aammalu aalisarnermik atuisut nakkutilliinerup ilaanut akiliuteqartinneqartalernissaat.

Periarfissat taasat maannamut aalisarneq pillugu inatsimmi tunngavissaqartinneqarnikuunngillat, taamaattumillu aalisarnermut apeqqutini arlalissuarni paasissutissanik pisariaqarluinnartunik aallerfissaqartarneq aamma maannamut killeqartuartarsimavoq.

Aalisarnerup Nunatta aningaasaqarniarneranut pingaaruteqarluinnartup siunertaq malillugu aaqqissuunneqarnerisooq qulaarneqarsinnaasimangilaq aningaasallu kaaviiartinneqarnerat, inatsisillu ilumut malinneqarnerisut iternga tikillugu ulloq maannamut paasissutissaatigineqanngillat. Tamanna aalisarneq pillugu inatsisip allanngortinneqarneratigut iluarsivigineqassaaq.

Allannguutit aalisarnerup ingerlanneqarneranut naalakkersuisoqatigiit kissaatigisaasa ilaanut naleqqersuulluarput. Pineqartut ilai tassaapput piujuaannartitsinerup isiginiarneqarnerulenera, aamma aningaasat qanoq ingerlaarnerisa nakkutigineqarnerulenerat. Taamaalilluta nuannaarutigaarput allannguutissatut siunnersuutikkut siunissami aalisarnerup avatangiisinut pinngortitamullu sunniutai naammaginatut inissimasariaqarnerat takuneqarsinnaalissamat. Taamatut oqaasertaliinikkut Kalaallit Nunaanni aalisarnikkut tunisassiat piujuaannartitsinissaq tunngavigalugu aalisarneqarsinnaanerata aalajangersarneqarpoq.

**Ataatsimiitaliami ikinnerussuteqartut Siumumeersut siunnersuut itigartitsissutigineqassasoq inassutigaaq, siunnersuullu pillugu ima oqaaseqaateqarlutik:**

Sinerissami avataasiornermilu aalisarsinnaanermut akuersissummik pissagaanni immikkut akiliuteqartarnissamik, tassalu nakkutilliinermut akiliummik taallugu, pingaartumik umiatsiararsortut eqqarsaatigalugit qanoq eqqarsartoqarnerisooq Siumumiit paaserusupparput tassami Ilaatigut siunnerfigineqarmat akuersissutinut ataasiakkaanut sinerissami aalisarnissamat 1.500,00 kruunit tikillugit akiliisitsisoqarsinnaasoq tassalu qalerallinnarnissamat, nipisanniarnissamat, saattuarnarnissamat saarullinnarnissamullu. Tassalu akuersissutinut ataasiakkaanut akiliuteqartitsinissaq ingerlanneqassappat tamanna umiatsiararsortunut ilungersunarsinnassasoq Siumumiit oqaatigissavarput, tassami orsussap akia aalisarnermilu atortussat akii eqqarsaatigalugit immikkut akiliuteqartarnissaq umiatsiararsortunut nammakkuminaassamat. taamatullu akiliuteqartitsinissaq aningaasanut inatsisissamat ikkunneqareersut oqaatigineqarpoq. Kiisalu aalisakkanut qalerualinnullu akitsuutissaq, aammalu rejerniartunut, sinerissami avataanilu aalisartunut, tonsimut ataatsimut 60,00 kruunimut akitsuutissaq naatsorsorneqarluni siunnerfigineqarmat neriunniartami avataasiortut aalisagarniartut rejerniartullu akiliuteqartitsinissaq nammassinnaassagaat, avammullu unammillernerme artornartorsiutaassanngitsoq. Kisianniuna ernumassutigigipput, paasissutissanik tamakkiisunik uumassusilinnut tunngasunik ilisimasamik pigisaqannginnerput aporfiginagu, aamma

nalunaaqutsersuisarnissamik aalisakkanik avammut niuernermi  
atuutilersitsinissamik inatsimmut massakut ikkussissagutta, biologit ilisimatuullu  
innersuussutaat kisiisa aallavigissagutsigit qimaariarsinnaajunnaassaagut  
tamannaluuna ernumanartoqartikkippit.

Tassami assersuutigalugu Biolog-it kissaatigereerpaat 2010-mut  
saarullinniartoqassanngitsoq, uanilu inatsisissami qularnaarlugu ikkunniarneqarpoq  
biologit innersuussutaat malillugit aaqqiisoqartassasoq, taava taamaalippat  
qimaariarsinnaajunnaarluta inatsimmut pitussaagut biologit innersuussutaat  
malissagaanni MSC-imillu nalunaaqutsersuinissaq aamma inatsimmut ikkuppet  
taava saarullimmik 1. kg-milluunniit tunisassiorffinnut tunisisoqarsinnaajunnaassaaq  
aammalu sinerissap avataani saarullinniartoqassanngilaq. Taamatut paasinninnerput  
ilumoornersoq Naalackersuisunut apeqqutigerusupparput. Naggataatigut Siumumiit  
oqaatigissavarput akuerisinnaannginnatsigu sinerissap qanittuani aalisartut, tassa  
umiatsiaararsortut mikisunillu angallatillit saarullinnik, arnarlunnik qaleralinnik  
saattussanillu aalisassatillutik tamatigut 1.500 kr. akileeqqaartalernissaat. Siumumiit  
taamatut oqaaseqarluta nalunaarutigissuarput Inatsisissamut allannguutissatut  
siunnersuut taamatut isikkoqartillugu akuerisinnaannginnatsigu.

**Ataatsimiititaliami ikinnerussuteqartut Atassummeersut siunnersuut  
itigartitsissutigineqassasoq inassutigaa, siunnersuullu pillugu ima  
oqaaseqaateqarlutik:**

Nunatsinni inuussutissarsiutit pingaarnersaat, aalisarnermik inuussutissarsiuteqarneq  
pillugu Naalackersuisut suliliinnarlutillu nunatta karsianut aningaasanik  
isaatitsigasuarfissatut annertuumik isumalluutigigaat ATASSUT-mit  
maluginiarparput.

Taamatuttaaq maluginiarparput taamatut aqutissiuussiniarnerminni pissutaatikkat  
aalisarnermik inuussutissarsiuteqartut akeqanngitsorsuarmik qalooriinnartutut  
namminerlu iluaqutissamik aningaasannaniartutut nalilerneqartariaqarnerarlugit.

Taamatut naqissusiineq ATASSUT-mit peqataaffiginngilarput aamma  
peqataaffiginnaviannngilarput.

Tatigeqatigiinneq ilumoortumillu suleqatiginnikkususseq kisimi aqutissaavoq  
inuussutissarsiummik ingerlataqartut pisortallu akornanni pisinnaatitaaffiit  
pisussaaffiillu torersumik siunissamullu isigisumik ingerlanneqassappata.

Taamaattumik ATASSUT-mit Naalackersuisut kaammattussavagut siumoortumik  
inernilersuinatik aammalu aalajangersaaniarnermi inatsisitigullu allannguiniarnermi  
inuussutissarsiuteqartut qulaassuaannarnagit suliaq ingerlateqqullugu.

Tamanna pinngippat inuussutissarsiut siuarsarneqarani akornutaasumik  
kinguarsarneqartuassaaq allaallu inuussutissarsiortut ilaannut  
ipsisitsissutaasinnaassaaq.

Siunnersuut manna Inatsisartunit akuersissutigineqassappat naatsorsuutigineqarpoq 13 mio. kr.-ingajaat nunatta karsianut isertitsissutaanerulissasut, ullualuillu matuma siorna raajanut akitsuutip qaffanneqarnissaa Inatsisartunut qaqqinneqarpoq tassuunalu 9 mio. kr.-it missaat nunatta karsianut isertitsissutaanerusussatut naatsorsuutigineqarluni.

ATASSUT-mit nalunngilarput aningaasat pineqartut Naalakkersuisut isumaqarfigigaat aalisarnermik inuussutissarsiuteqartunut suunngitsut imaaliallaannarlu akilersinnaagaat, uagut isitsinni aningaasarpassuupput inuussutissarsiummi nunarsuarmioqatigiit akornanni unammillerfioqisumi.

Taama oqaaseqarluni siunnersuummillu siuliani allassimasunut paasinninnerit tunngavigalugit Inatsisartut Aalisarnermut, Piniarnermut Nunalerinermullu Ataatsimiititaliaata siunnersuut Inatsisartunut aappassaaniigassanngortippaa.

Siulittaasoq/Siulittaasup tullia

---

[1] Akuersissummut ataatsimut akuersissummut akitsuut 1.500 kr.-iuppat aamma avataasiorluni aalisarnermi tonsimut akitsuut 60 kr.-iuppat. atuisut akiliutaat katillugit 12.915.000 kr.-ussapput.

Ilanngussaq